

Aukin fagmennska og gæði í æskulýðsstarfi sveitarfélaga

Fyrirspurn

Félag fagfólks í frítímapjónustu í samstarfi við systursamtök okkar frá Finnlandi og Svíþjóð eru að hefja þriggja ára samstarfsverkefni sem ber heitið Bootcamp for Youth Workers. Verkefnið hefur hlotið um 20.662.874 kr. styrk frá Evrópu unga fólksins en áætlað er að það sé 80% af verkefnakostnaði. Félagið mun leggja fram sjálfböðavinnu og fjármuni í verkefnið en eftir standa 3.500.000 kr. sem vantar í fjármögnun verkefnisins. FFF leitar því til sveitarfélaga til að taka þátt í verkefninu sem mun efla fagmennsku í frístundastarfi sveitarfélaga.

Hugmyndin að verkefninu er að fara að fyrirmynd nágrannalanda okkar og útbúa grunnnámskeið fyrir æskulýðsstarfsfólk sem byggir á helstu áherslupáttum úr tómstunda- og félagsmálafræði sem kennd er við Háskóla Íslands í bland við hagnýta fræðslu sem starfsfólk getur nýtt sér í starfinu. Útkoma verkefnisins verður þríþætt; grunnnámskeið fyrir æskulýðsstarfsfólk, matstæki fyrir óformlegt nám og handbók fyrir æskulýðsstarfsfólk sem mun styðja við námskeiðið og matstækið. Allar þessar afurðir verða settar á netið og verða aðgengilegar öllum sveitarfélögum án kostnaðar.

Við óskum eftir 600.000 kr. styrk frá Garðabæ sem lið í klára fjármögnun á verkefninu. Garðabær mun fá fullan aðgang að námskeiðinu sem og matstækinu þegar verkefninu lýkur.

Um Félag fagfólks í frítímapjónustu

Félag fagfólks í frítímapjónustu, FFF, er félag fagfólks sem starfar á vettvangi frítímans á vegum sveitarfélaga, s.s. í félagsmiðstöðvum, frístundaheimilum, frístundamiðstöðvum, ungmennahúsum og skrifstofum æskulýðsmála en á þeim vettvangi starfa allt að þúsund manns víðsvegar um landið. Félagið var stofnað í frístundamiðstöðinni Miðbergi 28. maí 2005.

Flestir nýta sér frítímapjónustu sveitarfélaganna með einum eða öðrum hætti á lífsleiðinni. Tilgangur með félaginu er að leggja áherslu á mikilvægi frítímapjónustu og sérþekkingar á málaflokknum. Jafnframt er tilgangurinn að vera leiðandi í faglegri umræðu og stjórnvöldum til

ráðgjafar um frítímaþjónustu. Félagið er einnig mikilvægur samráðsvettvangur fyrir fagfólk í frítímaþjónustu.

Í FFF eru 180 skráðir félagar sem starfa á vettvangi sveitarfélaga að frístundamálum. Félagar í FFF skrá sig í félagið á eigin forsendum en ekki sem stofnun eða á vegum sveitarfélaga. Við erum afar stolt af því sjálfböðastarfi sem fer fram innan FFF þar sem fagfólk sem starfar í tómstundastarfi vinnur aukalega á vettvangi félagsins við að auka fagmennsku á vettvangnum hér á landi.

Um verkefnið

Verkefnið Bootcamp for Youth Workers er þriggja ára samstarfsverkefni Félags fagfólks í frítímaþjónustu, Settlementti – samtaka hverfamiðstöðva í Finnlandi, Fritidsforum – samtaka um frístunda- og hverfamiðstöðvar í Svíþjóð og Norræna félaginu í Svíþjóð. Verkefnið hlaut styrk frá Evrópu unga fólksins og verða afurðir verkefnisins opnar öllum á netinu þegar verkefninu lýkur.

Verkefnið er þrískipt og snýr fyrsti hluti verkefnisins að því að hanna og þróa matstæki fyrir óformlegt nám. Markmiðið er að búa til verkfæri sem æskulýðsstarfsmenn geta nýtt í starfi sínu til að hjálpa ungu fólki að vekja athygli á og að meta það óformlega nám sem fram fer í tómstundastarfi.

Annar hluti verkefnisins snýr að því að útbúa námskeið fyrir æskulýðsstarfsfólk. Námskeiðið mun kenna æskulýðsstarfsfólki á matstækið ásamt því að fara yfir helstu fræði, tæki og töl sem æskulýðsstarfsmenn þurfa að búa yfir til að starfa faglega með ungu fólki.

Þriðji hluti verkefnisins er útgáfa handbókar sem dregur saman upplýsingar um matstækið og námskeiðið. Bókin á að nýtast æskulýðsstarfsfólki til stuðnings með námskeiðinu en einnig sem sjálfstætt verkfæri fyrir þá sem hafa ekki tök á því að sækja námskeið.

Í hverju landi fyrir sig hefur verið skipaður sjö manns sérfræðihópur af starfsfólki af vettvangi, starfsfólki háskóla sem sérhæfir sig í æskulýðsstarfi og fulltrúa frá fagfélögunum. Hvert land hefur svo tilnefnt þrjá aðila í verkefnateymi sem hittist þrisvar á ári til að samþætta vinnuna, deila þekkingu og útbúa afurðir verkefnisins.

Markmið verkefnisins er að auka gæði og meðvitund ungs fólks á gæðum í æskulýðsstarfi. Við viljum styðja við æskulýðsstarfsfólk við að byggja upp faglegt starf sem byggir á óformlegu námi og virkri þátttöku unga fólksins. Samstarfsaðilar okkar eru mörgum árum á undan okkur í því að þjálfa æskulýðsstarfsfólk og sjáum við fram á mikinn ávinning í því að starfa með þeim í stað þess að þurfa að finna upp hjólið.

Það hefur verið mikil aukning á fagmennsku í æskulýðsstarfi á síðastliðnum árum og spilar þar líklegast stærsta hlutverkið tilkoma náms í tómstunda- og félagsmálafræði í Háskóla Íslands sem á hverju ári útskrifar tugi sérfræðinga í tómstundastarfi. Það er hins vegar staðreynd að stór hluti æskulýðsstarfsfólks hér á landi eru tímabundið ráðnir hlutastarfsmenn sem stefna ekki á háskólanám í greininni. Við viljum að afurð þessa verkefnisins nýtist þessu starfsfólki sem starfar á gólfinu, einstaklingar sem vilja auka fagmennsku sína og verða betri starfsmenn án þess að skrá sig í þriggja ára háskólanám.

Tímalína verkefnisins er eftirfarandi (í viðhengi má sjá Gantt töflu með nákvæmari tímalínu):

1. Finna samstarfsaðila og klára fjármögnun á verkefninu
2. Kortleggja þörfina á matstæki fyrir óformlegt nám sem hefur það hlutverk að auka meðvitund um óformlegt nám í æskulýðsstarfi
3. Útbúa matstæki fyrir óformlegt nám
4. Setja upp grunnnámskeið fyrir æskulýðsstarfsfólk sem kennir einnig á nýja matstækið
5. Skrifa handbók fyrir æskulýðsstarfsfólk sem verður eins konar kennslubók á námskeiðinu og fyrir matstækið
6. Halda alþjóðlega ráðstefnu þar sem niðurstöður verkefnisins eru kynntar og heimasíða opnuð sem gerir allar afurðir aðgengilegar öllum sveitarfélögum

Allar nánari upplýsingar veitir undirritaður.

Verkefnastjóri:

Guðmundur Ari Sigurjónsson – Formaður FFF

fagfelag@fagfelag.is / www.fagfelag.is

846-6747